

欽定詩義折中

御纂詩義折中卷之十三

小旻之什二之五

旻天疾威敷于下土謀猶回遹何日斯沮謀臧不從
不臧覆用我視謀猶亦孔之邛

賦也敷布也猶與猷同回邪遹辟沮止邛病也言
旻天之疾威遍布于下土故下土之人謀猶邪辟
而無所底止也夫人之謀固多不臧亦有臧者乃
臧者不從而不臧者反用焉我從旁而觀之蓋愈
謀而國愈病矣

言事抄
卷之三
滄滄訛訛亦孔之哀謀之其臧則具是違謀之不臧
則具是依我視謀猶伊于胡底
賦也滄滄相和也訛訛相詆也具俱底至也言小
人羣謀以類相從其滄滄然和者黨同而無公是
也其訛訛然詆者伐異而無公非也志卑識鄙亦
可哀矣惟其無是非而有同異故謀之是者與己
不同則俱違焉謀之非者與己不異則俱依焉我
從旁而觀之其謀不知何所至也

我龜旣厭不我告猶謀夫孔多是用不集發言盈庭

誰敢執其咎如匪行邁謀是用不得于道

賦也集成也朱子曰卜筮數則煩瀆而龜亦厭之故不復告以吉凶謀夫多則是非相奪而莫適所從故所謀終亦不成蓋發言盈庭各是其是無肯任其責而決之者猶不行不邁而坐謀所適謀之雖審究何得于道路哉

哀哉爲猶匪先民是程匪大猶是經維邁言是聽維邁言是爭如彼築室于道謀是用不潰于成

賦也程法經常潰決也言謀之所以回邁者由爲

言事
卷之三
謀之人不考古人之成法以爲程式不揆天下之
大勢計其經常上之人惟淺近之言是聽下之人
惟淺近之言是爭是以謀夫愈多而愈不集也朱
子曰如將築室而與行道之人謀之人爲異論其
能有成也哉李樗曰謀之遠者似迂闊而難行謀
之近者似便捷而易用不知近者雖有小利而其
害隨至遠者雖無近功而可以終身無害苟非上
智之人惡能慎擇而決所從哉

國雖靡止或聖或否民雖靡盬或哲或謀或肅或艾

如彼泉流無淪胥以敗

賦也止定也膳多也艾與乂同肅乂哲謀聖洪範
五事之德也言謀猶如此是在位者無可與言矣
然國於天地必有與立今雖播遷而有聖者焉不
盡否也天生蒸民必有恆性今雖凋敝而有哲謀
者焉有肅乂者焉是在下者未嘗無善人也但當
此旻天疾威小人盈庭之日將挺身而與爭則必
至得禍而其人敗矣將隨聲而附和則喪其所守
而其人愈敗矣如彼泉流淪胥而不可止也君子

欲保全善類故勸其無淪胥以敗而思所以自處也

不敢暴虎不敢馮河人知其一莫知其他戰戰兢兢如臨深淵如履薄冰

比而賦也徒搏曰暴徒涉曰馮此言君子自處之道也不敢暴虎不與爭而撓其怒也不敢馮河不附和而蹈其波也既不激而不隨惟有守道以俟時耳事無兩可必有一是旣知其一不必更知其他矣然當此天人交病之日雖守道豈易言哉必

戰戰戒懼兢兢慎持苟非道者斷不敢近如臨深
淵惟恐陷而溺也卽是道者亦必謹而行之如履
薄冰惟恐肆而蹶也易曰需於泥災在外也自我
致寇敬慎不敗也言涉亂世之末流如需於泥敬
而慎之斯不淪胥以敗矣

小旻六章三章章八句三章章七句

小旻憂世也觀陰陽否泰之數君子小人常
並生者也取舍有定則君子在上是非不明
則君子在下矣而猶挾其是非

以與在位之小人爭必不勝也有淪胥以敗
耳故有心斯世者不敢輕爲犯患之事而守
道以全身其全身也非爲身也自全其身共
相警戒以全善類之身則剝之碩果不食卽
泰之拔茅彙征全其身正所以全天下也臨
深履薄豈徒然哉然此亦視其時與位焉小
旻之詩人一則曰我視謀猶再則曰我視謀
猶是乃局外旁觀之人故可守道以俟時若
已親與其謀在發言盈庭之列自當身執其

咎而猶欲畏慎以免禍則又非君子之道矣
世之與人家國而緘默自全者無以小旻爲
口實可也

宛彼鳴鳩翰飛戾天我心憂傷念昔先人明發不寐
有懷二人

興也宛小貌翰羽戾至也明發將旦也二人謂父
母也此孝子戒勉其兄弟也言鳴鳩雖小奮飛可
以戾天以興人苟奮勉皆可至於善也是以中心
憂傷念我之不及先人又懷父母生我之恩欲奮

勉以慰親志也

人之齊聖飲酒溫克彼昏不知壹醉日富各敬爾儀
天命不又

賦也齊整肅也聖睿思也克勝也富猶甚也又復
也此因懷父母而戒兄弟也言人能整肅於外睿
思於內則德性堅定雖飲酒而溫恭以勝之不爲
酒困也彼昏然而不知者內既不聖又加之以醉
而日甚則外益不齊而德喪矣故願兄弟之戒之
也各敬爾儀齊乎外以養其中斯聖通性定而命

立不然則福去災生天命不可以又邀也左傳曰
民受天地之中以生所謂命也於是有動作威儀
之節以定命也能者養之以福不能者敗以取禍
此之謂也

中原有菽庶民采之螟蛉有子蜾蠃負之教誨爾子
式穀似之

興也中原原中也菽大豆也螟蛉桑蟲蜾蠃土蜂
也土蜂取桑蟲而負之七日而化爲其子式用穀
善也朱子曰中原有菽則庶民采之矣以興善道

人皆可行也螟蛉有子則蜾蠃負之矣以興不似者可教而似也教誨爾子則用善道以似之可也戒之以不惟獨善其身又當教其子使爲善也何楷曰兄弟者親之枝也子者身之枝也各敬威儀以善其身所以繼先人也教子式穀以繼其身亦所以繼先人也

題彼脊令載飛載鳴我日斯邁而月斯征夙興夜寐無忝爾所生

興也題視也脊令飛則鳴行則搖人之黽勉不已

者似之邁征皆往也忝辱也言視彼脊令飛鳴勤
勞如此我與兄弟豈可自暇逸乎況我之日旣邁
矣爾之月亦征矣逝者如斯老將至矣而德業不
進父母之生我何爲乎故願彼此奮勉早作遲寐
窮日之力以敬身而教子庶乎可以不辱其所生
也東方朔曰日夜孳孳敏行而不怠譬如脊令飛
且鳴矣此之謂也

交交桑扈率場啄粟哀我填寡宜岸宜獄握粟出卜
自何能穀

比而賦也桑扈食肉之鳥交交往來之貌填與瘕
同病也岸與犴通鄉亭之獄也桑扈啄粟非所食
而食也喻民貧也病寡岸獄非所繫而繫也言刑
繁也民貧易於爲非刑繁易於觸禁則所以敬身
而不辱其親者宜更加謹矣故握粟出卜問何時
而能穀憂之甚也

溫溫恭人如集于木惴惴小心如臨于谷戰戰兢兢
如履薄冰

賦也詳言求穀之道也溫溫和柔以敬人也如集

于木恐失禮而隕越也惴惴小心以敬己也如臨
于谷恐徇欲而陷溺也戰戰兢兢以敬事也如履
薄冰恐履錯而顛躓也此各敬爾儀之實功以此
自爲則能穀矣以此教子則能似矣必如此而後
無忝所生有懷二人不虛也

小宛六章章六句

小宛孝子繼志也爲人子者以父母之心爲
心父母之心惟望子之保身惟望子之免禍
兄弟皆親之子也兄弟之子親子之子也皆

親之所懷也人子懷親則必懷親之所懷故
自敬其身勸兄弟各敬其身勸兄弟各教其
子以敬身一家之人皆爲善以免禍而後親
心乃慰一有不謹則天命不又而忝所生矣
日夜戰兢有以也樂正子春日一舉足而不
敢忘父母是故道而不徑舟而不游不敢以
先父母之遺體行殆一出言而不敢忘父母
是故惡言不出於口忿言不反於身不虧其
體不辱其親可謂孝矣詩人其知之矣